

四庫全書

集部

欽定四庫全書

集部
釋文紀卷九

詳校官中書_臣朱文翰

主事銜_臣徐以坤覆勘

總校官庶吉士_臣何思鈞

校對官編修_臣盧遂

謄錄監生_臣紀汝夔

欽定四庫全書

釋文紀卷九

明 梅鼎祚 輯

晉

後趙 以下僭國

前燕

南燕

後秦

後趙主石勒

字世龍上黨潞人始事劉淵篡位稱趙王居鄴

尊佛圖澄書

澄見後

和尚國之大寶榮爵不加高祿不受榮祿匪顧何以旌

德從此已往宜衣以綾錦乘以雕輦朝會之日和尚升

殿常侍以下悉助舉輿太子諸公扶翼而上主者唱大和尚衆坐皆起以彰其尊高僧傳

石虎

字李龍勒從子弒勒子自立稱帝

下中書料簡沙門書

虎僭號建武時百姓因佛圖澄率多奉佛皆營造寺廟削

髮出家虎乃下書問中書令中書著作郎王虔等奏中書令王波亦同度議虎以澄故復下書于是慢戒之徒因之以厲

佛號世尊國家所奉里閭小人無爵秩者為得應事佛與不又沙門皆應高潔貞正行能精進然後可為道士

今沙門甚衆或有姦宄避役多非其人可料簡詳議真偽

中書著作郎王度奏

夫王者郊祀天地祭奉百神載在祀典禮有常饗佛出西域外國之神功不施民非天子諸華所應祀奉往漢明感夢初傳其道唯聽西域人得立寺都邑以奉其神其漢人皆不得出家魏承漢制亦循前軌今大趙受命率由舊章華戎制異人神流別外不同內饗祭殊禮華

夏服禮不宜雜錯國家可斷趙人悉不聽詣寺燒香禮拜以遵典禮其百辟卿士下逮衆隸例皆禁之其有犯者與淫祀同罪其趙人為沙門者還從四民之服

復下書

度議云佛是外國之神非天子諸華所可宜奉朕生自邊壤忝當期運君臨詣夏至於饗祀應兼從本俗佛是我神正所應奉夫制由上行永世作則苟事允無虧何拘前代其夷趙百蠻有捨於淫祀樂事佛者悉聽為道

士

並高
僧傳

竺佛圖澄

天竺人本姓帛氏少學道妙通玄術晉永嘉初來洛陽已從石氏終鄴宮寺

謝石虎勞問書

澄從石勒甚見篤信號大和尚及虎僭位傾心事澄澄稱疾虎勤遣

勞問澄

謝虎

陽月和煖願御膳順宜貧道先嬰重疾年衰益甚邈蒙
慈詔曲垂光慰感懼之至十百于懷幸遇慶會而形不
自運此情此慨良無以喻

辭石虎書

澄自啟瑩墓於鄴西紫陌謂弟子法祚曰禍亂漸萌吾先從化矣臨化遣人辭

虎

物理必遷身命非保貧道燄幻之軀化期已及既荷恩

殊重故逆以仰聞

並高僧傳
不明言書然

按此雖
非面語

前秦主苻堅

字永固畧陽氏人為秦龍驤將軍
賦主自立稱大秦天王居長安

與朗灋師書

朗以秦皇始元年移卜太山頃乃於
金興谷崑崙山中別立精舍堅欽其

德素遣
使觀遺

皇帝敬問太山朗和尚大聖膺期靈權超逸蔭蓋十方
化融無外若山海之養羣生等天地之育萬物養存生

死澄神寂妙朕以虛薄生與聖會而隔萬機不獲輦駕
今遣使人安車相請庶冀靈光迴蓋京邑今并送紫金
數斤供鑊形像絹綾三十疋奴子三人可備灑掃至人
無違幸望納受想必玄鑒見朕意

竺僧朗答秦主苻堅書

僧朗頓首頓首如來永世道風潛淪忝在出家栖心山
嶺精誠微薄未能弘匠不悟陛下遠問山川詔命慙慙
實感恩旨氣力虛微未堪跋涉願廣開灑輪顯保天祚

蒙重惠賜即為施設福力之功無不蒙賴貧道才劣不

勝所重僧朗頓首頓首

廣弘明集

尊朗濠師詔

堅沙汰衆僧欽太山僧朗德素乃別詔

朗濠師戒德冰霜學徒清秀崑崙一山不在搜例

高僧傳

趙整

字文業一名正署陽清水人仕苻堅秘書侍郎

釋迦頌

整因關中法盛欲出家堅未許及堅死遂更名道整作頌專精經律終于襄陽

我生何以晚泥洹一何早歸命釋迦文今來受大道

傳

高僧

前燕主慕容垂

字道明鮮卑人號子封吳王奔苻堅後叛秦自稱燕王居中山

與朗濬師書

皇帝敬問太山朗和尚澄神靈緒慈陰百國凡在含生
孰不蒙潤朕承藉纂統方夏是膺晉蜀不恭魏武含慨
今二賊不平朕豈獲安又元戎剋興征掃暴亂至人通
靈隨權指化願兵不血刃四海混伏委心歸誠久敬何
已今遣使者送官絹百疋絮棗三領綿五十斤幸為咒
願

僧朗答燕主慕容垂書

僧朗頓首頓首能仁御世英規遐邇光敷道化融濟四海貧道忝服道味習教山林仰惟詔旨諮及國難王者膺期統有六合大能并小自是常倫若葵藿之傾太陽飛步之宗麟鳳皇澤載融羣生繫仰陛下高明何思不服貧道窮林蒙賜過分僧朗頓首

廣弘明集

南燕主慕容德

字玄明號少子初為後燕主慕容寶丞相據廣固自稱燕王

與朗濠師書

皇帝敬問太山朗和尚遭家多難舊禍屢臻昔在建興
王室西傾賴武王中興神武御世大啟東夏拯拔區域
遐邇蒙蘇天下幸甚天未忘舊武王即晏永康之始西
傾東蕩京華播越每思靈闕屏營飲淚朕以寡德生在
亂兵遺民未幾繼承天統幸和尚大恩神祇蓋護今使
使者送絹百疋并假東齊王奉高山荏二縣封給書不
盡意稱朕心焉

建興乃後燕主慕容垂廣弘明作建熙
誤武王為垂孫盛廣弘明寡作無統

祿作

僧朗答南燕主慕容德書

僧朗頓首陛下龍飛統御百國天地融溢皇澤載賴善
逢高鑒惠濟黔首蕩平之期何憂不一陛下信向三寶
恩旨殊隆貧道味靜深山豈臨此位且領民戶興造靈
刹所崇像福冥報有歸僧朗頓首頓首

又報慕容德

德初僭位都滑臺尋為魏所據議欲先取一方為閭中之基中書令

張華議主彭城北地王鍾等勸復攻滑臺尚書潘聰以滑臺四通八達非帝王之居彭城土曠人稀非久安之計青齊沃壤固山負海號曰東秦當進討叛臣辟閭渾而據廣固德

未決僧朗素善占候使牙門蘇撫訪其所適
朗報德德引師而南徐充歸附渾奔魏追斬
之以廣固都焉是年為朗建神通寺于齊州
仍遺書朗撫常問燕年世朗筮之曰燕衰庚
戌年則一紀世則及子
言皆驗 此報在前

山野絕俗之士不應預聞朝議但有待之累非有託無
以立陛下今即聞之檀越敬覽三策潘尚書之議可謂
興邦之策矣且今歲之初彗星起於奎婁遂掃虛危彗
者除舊更新之象奎婁為魯之分野虛危為齊之分野
宜先定兗州巡撫琅邪待秋風戒節然後北轉臨齊此

天道也

並十六國春秋南燕錄

後秦主姚興

字子畧本赤亭羌苻子襲位去帝號稱秦王居長安

與安成侯姚嵩述佛義書

興少崇三寶銳意講集什既入關多所傳譯興

惟佛道唯善信為出苦之長津御世之洪則乃著通三世論勗示因果以詰什什答書復與嵩

述之

嵩見後

吾曾以已所懷疏條摩訶衍諸義圖與什公評詳厥衷遂有哀故不復能斷理未久什公尋復致慶自爾喪戎相尋無後意事遂忘棄之近以當遣使送像欲與卿作

疏箱篋中忽得前所條本末今送示卿徐徐尋撫若於卿有所不足者便可致難也見卿來日並可以當言笑吾前試通聖人三達觀以諮什公公尋有答今並送往諸此事皆是昔日之意如今都無情懷如何矣

通三世論

諸什法師

曾問諸法師明三世或有或無莫適所定此亦是大法中一段處所而有無不泮情每慨之是以忽疏野懷聊試益浪言之誠知益浪之言不足以會理然曾襟之中

欲有少許意了不能默已輒疏條相呈匠者可為折衷
余以為三世一統循環為用過去雖滅其理常在所以
在者非如阿毗曇注言五陰塊然喻若足之履地真足
雖往厥跡猶存常來如火之在木木中欲言有火耶視
之不可見欲言無耶緣合火出經又云聖人見三世若
其無也聖無所見若言有耶則犯常嫌明過去未來雖
無眼對理恒相因苟因理不絕聖見三世無所疑矣

鳩摩羅什答後秦主姚興書

雅論大通甚佳去來定無此作不通佛說色陰三世和合總明為色五陰皆爾又云從心生心如從穀生穀以是故知必有過去無無因之咎又云六識之意識依已滅之意為本而生意識又正見名過去業未來中果法也又十方中第二力知三世諸業又云若無過去業則無三塗報又云學人若有漏心中則不應名為聖人以此諸比固知不應無過去若無過去未來則非通理經法所不許又十二因緣是佛法之深者若定有過去

未來則與此法相違所以者何如有穀子地水時節芽
根得生若先已定有則無所待有若先有則不名從緣
而生又若先有則是常倒是故不得定有不得定無有
無之說唯時所宜耳以過去法起行業不得言無又云
今不與昔對不得言有雅論之通甚有佳致又大品所
明過去如不離未來現在如未來現在如亦不離過去
如此亦不言無也此實是經中之大要俟得高對道復
盡之

通不住法住般若

衆生之所以不階道者有著故也是以聖人之教恒以去著為事故言以不住般若雖復大聖玄鑒應照無際亦不可著著亦成患欲使行人忘彼我遺所寄汎若不繫之舟無所倚薄則當於理矣

通聖人放大光明普照十方

聖人之教玄通無涯致感多方不可作一途求不可以一理推故應粗以粗應細以細應理固然矣所以放大

光明現諸神變者此應十方諸大菩薩將紹尊位者耳
若處俗接粗復容此事耶阿含經云釋氏之處天竺四
十餘載衣服飲食受諸患痛與人不別經又云聖人亦
入鹿馬而度脫之當在鹿馬豈異於鹿馬哉若不異鹿
馬應世常流不待此神變明矣每事要須自同於前物
然後得行其化耳

通三世

衆生歷涉三世其猶循環過去未來雖無眼對其理常

在是以聖人尋往以知往逆數以知來

通一切諸法空

大道者以無為為宗若其無為復何所有耶

姚嵩上後秦主姚興佛義表

臣言奉陛下所通諸義理味淵玄詞致清勝間詣踰於
二篇妙盡侔乎中觀詠之翫之紙已致勞而心猶無厭
真可謂當時之高唱累劫之宗範也但臣頑闇思不參
玄然披尋之日真復詠歌弗暇不悟弘慈善誘乃欲令

參致問難敢忘愚鈍輒位敘所懷豈曰存難直欲諮所未悟耳臣言上通三世甚有深致既已遠契聖心兼復抑正衆說宗塗疊疊超絕常境欣悟之至益令賞味增深加為何公研覈該備實非愚臣所能稱盡正當銘之懷抱以為心要耳臣言上通不住法住般若義云衆生所以不階道者有著故也聖心玄詣誠無不盡然至于標位六度而以無著為宗取之於心誠如明誨即之于事脫有未極夫無著雖妙似若有不即真兩實有不即

真兩冥恐是心忘之謂耳竊尋玄教如更有以謹牒成
言以攄愚見故經云以無所捨法具足檀波羅蜜以此
三事不可得故三者既冥有無無當無當之理即同幻
化以此而推恐不住之致非直忘彼我遺所寄而已

詔云放大光明諸神變者此自應十方諸大菩薩將紹
尊位者耳斯理之玄固非庸近所參然不得已之情猶
欲言所未達夫萬有不同精麤亦異應彼雖殊而聖心
恒一恒一故圓以應之不同故權以濟之雖鹿馬而未

始垂其大雖現神變而未始遺其細故淨名經云如來或以光明而作佛事或以寂寞而作佛事顯默雖異而終致不二然則於小大之間恐是時互說耳如華手經初佛為德藏放大光明令諸衆生普蒙其潤又思益經中網明所問如來三十三種光明一切遇者皆得利益法華經云佛放眉間相光亦使四衆八部咸皆生疑又云處闇衆生各得相見苟有其緣雖小必益苟無其因雖大或中故般若經云若有衆生遇斯光者必得無上

道又以神變令三惡衆生皆生天上以此而言至於光明神變之事似存平等敢緣慈顧輒竭愚思若復哀矜重開導者豈直微臣獨受其賜

詔云大道者以無為為宗若其無為復何所有耶至理淵淡誠不容言然處在涉求之地不得不尋本以致悟不審明道之無為為當以何為體若以妙為宗者雖在帝先而非極若以無有為妙者必當有不無之因因稱俱未冥詎是不二之道乎故論云無於無者必當有於

有有無之相譬猶修短之相形耳無理雖玄將恐同彼
斷常常猶不可況復斷耶然則有無之津乃是邊見之
所存故中論云不破世諦故則不破真諦又論云諸法
若實則無二諦諸法若空則無罪福若無罪福凡聖無
泮二苟無泮道何所益由臣闇昧未悟宗極唯願仁慈
重加誨諭

答安成侯姚嵩

卿所難問引喻兼富理極深致實非庸淺所能具答今

為當都格以相酬耳。卿引般若經云：若有衆生遇斯光者，必得無上道。即經所言未聞有凡流而得見光明者。如釋迦放大光明，普照十方。當斯之時，經不言有羣品而得見其怪而異之者，皆是普明之徒。以斯言之，定不為羣小也。卿若以衆生為疑者，百億菩薩豈非衆生之謂耶？然經復云：普明之詣釋迦，皆與善男子、善女人持諸華香來供養釋迦，及致供養之徒，自應普蒙其潤也。但光明之作本，不為善男子、善女人，所以得蒙餘波者。

其猶蠅附驥尾得至千里之舉耳卿又引神變令三惡衆
生得生人天若在鹿為鹿在馬為馬而度脫之豈非神
變之謂耶華手思益法華諸經所言若云放大光明自
應與大品無異也若一一光明以應適前物此作非人
天所通夫光明之與寂寞此直發意有叅差其揆一也
卿引經言施者受者財物不可得與不住法不住般若
未有異二者直是始終之教也統而言之俱是破著之
語耳何者罪不罪施者受者及財物都不可得若都不

可得復何所著是勸無所著明矣。又問明道之無為
為當同諸法之自空為妙空無以成極耶。又引論中二
諦之間言意所不及道之無為所寄耶。吾意以謂為道
止無為未詳所以宗也。何者。夫衆生之所以流轉生死
者皆著欲故也。若欲止於心即不復生死。既不死潛
神玄漠與空合其體是名涅槃耳。既曰涅槃復容有名
於其間哉。夫道以無寄為宗。若求寄所在恐乃惑之大
者也。吾所明無為不可為有者意事如隱尋求或當小

難今更重伸前義卿所引中論即吾義宗諸法若不空則無二諦若不有亦無二諦此定明有無不相離何者若定言有則無以拔高士若定言無則無以濟常流是以聖人有無兼抱而不捨者此之謂也然諸家通第一義廓然空寂無有聖人吾常以為殊太逕廷不近人情若無聖人知無者誰也

姚嵩重上後秦主姚興表

臣言奉賜還詔誨喻周備伏尋之日欣踊無量陛下爰

發德音光闡幽極拓道義之門演如來之奧冥宗隱而
復彰玄扉掩而再敞文外之旨可謂朗然幽燭矣夫理
玄者不可以言稱事妙者固非常詞之所讚雖欲心口
仰詠亦罔知所盡由臣愚鈍而猥蒙陛下褒飾之美誠
復欣戴殊眷實赦比仰味微言研詠彌至其為蒙悟豈
唯過半之益但臣仍充外役無由親承音旨每望雲遐
慨實在罔極不勝延條謹以申聞臣嵩言

重答安成侯姚嵩

得表具一二吾常近之才加多事昏塞觸事面牆不知道理安在為復以卿好樂玄法是以聊復益浪以言之耳而來喻過美益以不安

姚嵩謝後秦主姚興珠像表

臣言奉珠像承是皇后遺囑所建禮覲之日永慕因極伏惟感往增懷臣言先承陛下親營像事每注心延望遲冀暫一禮敬不悟聖恩垂及乃復與臣供養此像既功寶並重且於制作之理擬若神造中來所見珠像誠

當竒妙然方之於此信復有間瞻奉踊躍實在無量夫
受乾施者無報蒙恩隆者無謝雖欲仰陳愚誠亦復莫

知所盡臣言

並廣弘明集

僧碧為國內僧主詔

碧姓傳北地泥陽人博通經律為興所重及羅什入闍僧

尼廣集興慮有愆漏宜立僧主因下書給車與吏力碧資侍中秩傳詔羊車各二人還等並有厚給供事訖儉凡惟時望

大法東遷於今為盛僧尼已多應須綱領宜授遠規以
濟頽緒僧碧法師學優早年德芳暮齒可為國內僧主

僧遷法師禪慧兼修即為悅眾法欽慧斌共掌僧錄高僧傳

與恒標二公勸罷道書

姚興以恒標二人有經國之量勅尚書令姚顯敷逼

罷道又下書恒標等問境救之殆而得免於是
窺影巖壑畢命幽藪弘明集作姚畧畧畧以興

字子畧也

卿等樂道體閒服膺法門皦然之操義誠在可嘉但朕
臨四海治必須才方欲招肥遁於山林搜陸沈於屠肆
況卿等周旋篤舊朕所知盡各挹幹時之能而潛獨善

之地此豈朕求賢之至情卿等兼弘深趣邪昔人有言
國有驥而不乘方惶惶而更索是之謂也今勅尚書令
顯便奪卿等二乘之福心由卿清名之容室讚時益世
豈不大哉苟心存道味寧繁白黑望體此懷不以守節
為辭

識歷代三寶紀作實朕臨作君臨治
必作治急讚時益世作翼贊時世

釋道恒道標答秦主書

奉去月二十八日詔勅尚書令奪道恒標等法服承命
悲懼五情失守俯仰慙惶無地自厝恒等誠才質闇短

染法未久所存既重眷慕亦深猥蒙優詔褒飾過美開
諭誨勵言理備至但情之所安實懷罔已法服之下誓
畢身命兼少習佛法不閑世事徒發非常之舉終無殊
異之功雖有拔能之名而無益時之用未見機毫之補
將有山岳之損竊為陛下不取也光武尚能縱嚴陵之
心魏文全管寧之操折至尊之高懷遂匹夫之微志在
宥羣方靡不自盡況陛下以道御物兼弘三寶使四方
義學之士萃於京師新異經典流乎遐邇大法之隆於

茲為盛方將闡揚洪化助明振暉嗣祇洹之遺響扇靈
鷺之餘風建千載之軌模為後生之津塗而恒等豈可
獨屈於明時不得伸其志願伏願鑒其元元之情特垂
曠蕩通物之理更賜明詔聽遂微心則銜恩九泉感德
累劫不勝戰悚謹奏以聞

徒發非常之舉一
作徒廢非常之業

詔恒標二公

省所奏具意今所以相屈者時所須也不復相推本心
以及於此煩慙懃廣自料理吾之情趣想卿等體之在

素不復煩言便可奉承時命勉菩薩之蹤耳

道恒道標重答秦主表

道恒等近自陳寫冀悟聖鑒重奉明詔不蒙矜恕伏讀
悲惶若無神守陛下仁弘覆載使物悅其性恒等少習
法化愚情所樂誓以微命與法服俱盡而過恩垂及眷
忘其陋勸弘菩薩兼濟之道然志力有限寔所不堪非
徒餘年苟自求免直愚懷所存私悃必守伏願鑒恕一
往之誠不責偏執之咎特賜恩旨聽遂微心屢延明詔

隨用悚息不勝元元之至謹重奏以聞

詔恒標二公

得重奏一二具之情事具如前詔但當開意以從時命
無復煩於鄭重也

道恒道標重答秦主表

道恒等愚意所執具如前表精誠微薄不能感悟聖心
累蒙還詔未蒙慈恕俯仰憂怖無復心情陛下道懷虛
納養物無際願開天地之恩得遂一介之志愚守之誠

畢命無辜分受違詔之愆甘引無恨屢紆聖聽追用悚
息不任因極之情謹奏以聞

與鳩摩羅耆婆書

鳩摩羅什初一名鳩摩羅耆婆外國製名多以父母為本什父

鳩摩炎母字耆婆故兼取為名 高僧傳作致書什碧二法師什碧答書

別已數旬旋有思想漸暖比日何如小虜遠舉更無處
分正有憤然耳頃萬事之殷須才以理之近詔道恒等
令釋羅漢之服尋菩薩之蹟想當盤桓耳然道無不在
法師可勸進之苟廢其尋道之心亦何必須爾也致意

遷上人別來何似不審碧統復何如多事不能一一為

書恒等亦可煩諸上人勸其令造菩薩之行

並弘明集

僧碧等奏

興復命僧碧等勉論必遂其心碧等奏略興又下書與碧等廣弘明作與

遷等書而無前奏見十六國春秋

惟聖人能通天下之志恒標業已毀除鬚髮著不正之衣今使處縉紳之朝非其志也且大秦龍興異才輩出如恒標等未為卓異何足拘以文網也

又報僧碧等書

省疏所引一二具之朕以謂獨善之美不如兼濟之功
自守之節未若拯物之大雖子陵頡頑於光武君平傲
岸於蜀肆周黨辭祿於漢朝杜微稱聾於諸葛此皆偏
尚取介之士耳何足以闢嘿語之要領高勝之趣哉今
九有未乂黔黎荼蓼朕以寡德獨當其弊思得羣才共
康至治法師等雖潛心法門亦毗世宣教蹤不能導物
化時勉人為治而遠美辭世之許由近高散髮於謝敷
若九河橫流人盡為魚法師等雖毗世宣教亦安施乎

而道恒等伏膺法訓為日久矣然其才用足以成務故
欲枉奪其志以輔暗政耳若福報有徵佛不虛言拯世
急病之功濟時寧治之勲功福在此而不在彼可相誨
諭時副所望

釋僧碧僧遷法服法支鳩摩羅耆婆等答秦主
書

蓋聞太上以道養民而物自是其須有德而天下治是
以古之明主審達性之難御悟任物之易因故堯放許

由於箕山陵讓放杖於魏國高祖縱四皓於終南叔度
辭蒲輪於漢世晉國戴逵被褐於剡縣謝敷離髮於
若耶蓋以適賢之性為得賢也故上有明君下有韋帶
逸民之風垂訓於今矣今道標恒等德非圓達分在守
節且少習玄化伏膺佛道一往之誠必志匪席至於敷
演妙典研究幽微足以啟悟童稚助化功德使物識罪
福則有濟苦之益苟佛不虛言標等有弘毗邪之訓矣
竊聞近日猥蒙優詔使釋法服將擢翠翹於寒條之上

曜扶渠於重冰之下斯誠陛下仁愛愷悌寬不世之恩
然碧等眷眷竊有愚心以陛下振道德之綱以維六合
恢九德之綱以羅四海使玄風扇千載之前仁義陶萬
世之後宇宙之外感純德以化寬九域之內肆玄津以
逍遙匹夫無溝壑之怨嫠婦無停緯之歎此實所以垂
化海內所以仰賴愚謂恒標雖區區一介守所見為小
異然故在羅網之內即是陛下道化之一臣昔幸佐治
十二年未聞釋奪法衣形服世議苟於時有補袈裟之

中亦有弘益何足復奪道與俗違其適性昔巢由抗節堯
許俱高四皓匪降上下同契斯乃今古之一揆百代之
同風且德非管仲不足華軒堂阜智非孔明豈足三顧
草廬願陛下放既往之恩從其微志使上不過惠下不
失分則皇唐之化於斯而在箕穎之賓復見今日矣
等庸近獻愚直言懼觸天威追用悚息僧碧等言

並弘明集

物自是一作物自足其類有德而天下治一作其復
有德而治天下易因一作多因漢世一作漢岳數演一

作數析

此

書字有脫誤

與朗法師書

皇帝敬問太山朗和尚懃神履道飛聲映世休聞遠振

常無已已朕京西夏思濟大猷今闕闕未平事惟左右

已命元戎剋寧伊洛冀因斯會東封封廵省憑靈仗威須

見指授今遣使者送金浮圖三級經一部寶臺一區庶

望玄鑒照朕意焉

廣弘明集

姚嵩

興之弟仕鎮西將軍秦州刺史歷司空封安成侯留心經典專精釋道屢請什講說新經後為

氏王楊
威所害

遺慧遠書

興欽遠名德歎其才思致書殷勤信備連接贈以龜茲國細絲雜變像以伸款

心又令姚嵩獻其珠像釋論新出送論并遺書遠遠謂大智論文句繁廣初學難尋乃抄其要

文序致淵雅以書答之

大智度論新譯訖此既龍樹所作又是方等旨歸宜為一序以宣作者之意然此諸道士咸相推謝無敢動手法師可為作序以遺後之學者

慧遠答姚嵩書

尺牘作遠答鳩摩羅什誤

欲令作大智論序以伸作者之意貧道聞懷大非小楮

所容汲深非短綆所測披省之日有愧高命又體羸多
疾觸事有廢不復屬意已來其日亦久緣來告之重輒
麤綴所懷至於研究之美當復寄諸明德

出三藏記集
高僧傳

鳩摩羅什

此云童壽一名羅耆婆天竺人家世國相
隨母出家博覽五明諸論善達吉凶留住

龜茲轉停涼土涼主呂隆表降姚興什
方入關以後秦弘始十一年終于長安

妖異奏

什在龜茲呂光破龜茲得什僭號涼土至
庶子纂立二年有猪生龍出之異什奏不

省纂竟被殺

什乃入關

比日潜龍出遊豕妖表異龍者陰類出入有時而今屢

見則為菑肯必有下人謀上之變宜克已修德以答天威

西方辭體論

沙門慧嚴才識高明常隨什傳寫什每為嚴論西方辭體商略同異

天竺國俗甚重文製其宮商體韻以入絃為善凡覲國王必有讚德見佛之儀以歌歎為貴經中偈頌皆其式也但改梵為秦失其藻蔚雖得大意殊隔文體有似嚼飯與人非徒失味乃令嘔噦也

贈沙門法和頌

心山育明德流薰萬由延哀驚孤桐上清音徹九天

並高

傳僧

竺佛念

涼州人諷習衆經華梵兼釋苻姚二代為譯人之宗

王子法益壞目因緣經序

此序乃前秦苻堅建初時作

原夫善惡之運契猶形影之相顧受對明驗凡三差焉
現世中世後世播九色之深恩以悅天妃之耳目孤禽
投玉而全命形受五刑之切酷斯現報也羣徒潜淪於
幽壑神陟輪漂而不段身酸歷世之殃疊不曉王子之

喪目斯中報也阿蘭從禍於無想嬰佩永惑於始終為
著翅之暴狸飛沈受困而難計斯後報也故聖人降靈
必有所由非務不務清白明矣玄鑒三世弱喪之流深
記來變壞形之累趣使引入百練之室自如來逝後阿
育登位網維閻浮光被六合圖形神寺八萬四千羅漢
御世汎濟億數國主師宗玄化滂沛萬民仰戴而不已
神祇欽賴而愈深然王子法益宿植洪業生在王宮容
貌殊特復受此對靡知緣起會秦尚書令輔國將軍宗

正卿領城門校尉使者司隸校尉姚晃者南安郡人也
親姚詔之次兄字景疑文為儒表則列勲於千載武為
邀羣則皎然而獨標亢音通寔則辯機而曠遠執素縱
情則翺翔而無倫德也純懿範也難模赫逸翰於羣才
震龍威於昆鋒然愍永惑之叵救傷愚黨之不寤欲紹
先勝之遺迹豎玄宗於末俗故請天竺沙門曇摩難提
出斯緣本秦建初六年歲在辛卯於安定城三月十八
日出至二十五日乃訖梵本三百四十三首盧傳為漢

文一萬八千言佛念譯音情義寔難或離文而就義或
正滯而傍通或取解於誦人或事略而曲備異將來之
學士令鑒罪福之不朽設有毫釐潤色者盡銘之於萌兆
故序之焉

出三藏記 大藏所字 函明驗作朗驗現世
中世後世作現也中也後也五則作五杭不

務作
不預

釋道恒

藍田人學該內外才思清敏從什譯出衆經
多助詳定後與道標並入瑯邪山終世不出

釋駁論

并序

晉義熙之年如聞江左袁何二賢並商略治道諷刺時

政雖未覩其文意者似依傍韓非五蠹之篇遂譏世之
闕發五橫之論而沙門無事猥落其例余恐眩曜時情
永淪邪惑不勝憤惋之至故設賓主之論以釋之

有東京束教君子詰於西鄙傲散野人曰僕曾預聞佛
法冲邃非名教所議道風玄遠非器象所擬清虛簡勝
非近識所關妙絕羣有非常情所測故每為時君之所
尊崇貴達之所欽仰於是衆庶朋契雷同奔向咸共嗟
詠稱述其美云若染漬風流則精義入微研究理味則

妙契神用澡塵垢於胸心脫桎梏於形表超俗累於寵
樊邈世務而高蹈論真素則夷齊無以踰其操遺榮寵
則巢許無以過其志味玄旨則顏冉無以參其風去紛
穢則松喬無以比其潔信如所談則義無間然矣但今
觀諸沙門通非其才羣居猥雜未見秀異混若涇渭渾
波泯若薰蕕同篋若源清則津流應鮮根深則條穎必
茂考其言行而始終不倫究其本末幾有無校僕之所
以致怪良由於此如皇帝之忘智據梁之失力皆在鑪

鍾之間陶鑄以成聖者苟道不虛行才必應器然沙門
既出家離俗高尚其志違天屬之親捨榮華之重毀形
好之飾守清節之禁研心唯理屬已唯法投足而安蔬
食而已使德行卓然為時宗仰儀容邕肅為物軌則然
觸事蔑然無一可採何其栖託高遠而業尚鄙近至於
營求孜孜無暫寧息或懇殖田圃與農夫齊流或商旅
博易與衆人競利或矜恃醫道輕作寒暑或機巧異端
以濟生業或占相孤虛妄論吉凶或詭道假權要射時

意或聚畜委積頤養有餘或指掌空談坐食百姓斯皆德不稱服行多違法雖暫有一善亦何足以標高勝之美哉自可廢之以一風俗此皆無益於時政有損於治道是執法者之所深疾有國者之所大患且世有五橫而沙門處其一焉何以明之乃大設方便鼓動愚俗一則誘喻一則迫脅云行惡必有累劫之殃修善便有無窮之慶論罪則有幽冥之伺語福則有神明之祐敦厲引導勸行人所不能行逼強切勒勉為人所不能為上

減父母之養下損妻孥之分會同盡餽饈之甘寺廟極壯麗之美割生民之珍玩崇無用之虛費罄私家之年儲闕軍國之資實張空聲於將來圖無象於未兆聽其言則洋洋而盈耳觀其容則落落而滿目考現事以求徵並未見其驗真所謂擊影捕風莫知端緒亮僕情之所未安有識者之所巨惑若有嘉信請承下風脫有暫悟永去其滯矣主人憮然有間慨爾長嘆咄異哉子之所陳何其陋也夫鄙俗不可以語大道者滯於形也曲

士不可以辯宗極者局於名也今將為子略舉一隅自
可思反其宗矣蓋聖人設教應器投法受量有限故化
之以漸錄善心於毫端忘鄙吝於丘壑片行之善永為
身資一念之福終為神用始覆一簣不可責以為山之
功方趨絕境不中窮以括囊之實然海之所以稱大者
由無皦潔之清道之所以稱晦跡者以無赫然之觀夫
怨親婉孌有心之所滯而沙門遺之如脫屣名位財色
世情之所重而沙門視之如秕糠可謂忍人所不能去

斯乃標尚之雅趣弘道之勝事而云蔑然豈非妙賞之
謂乎又且志業不同歸向塗乖岐逕分轍不相領悟未
見秀異故其宜耳古人每歎才之為難信矣周號多士
亂臣十人唐虞之盛元凱二八孔門三千並海內翹秀
簡充四科數不盈十於中伯牛廢疾回也六極商也慳
惓賜也貨殖予也難雕由也凶愎求也聚斂任不稱職
仲弓雖駢出於犁色而舉世推德為人倫之宗欽尚高
軌為楷紳之表百代詠其遺風千載仰其景行至於沙

門乃苦其剝節酷相瓦礫斯豈君子弘通之道雅正之
論哉此由或人入班輸之作坊不稱指南之巧妙但譏
拙者之傷手真可謂服膺下流志存鄙劣昔丞相問客
俗言鵠臍食母寧有是乎客答但聞慈烏反哺耳相乃
悵然自愧失言今子處心將無似相之問也君子遇惡
揚善反是謂何又云投足而安且林野蕭條每有寇盜
之患城傍入出動嬰交遊之譏處身非所則招風塵之
累婆娑田里則犯人間之論二三無可進退唯谷宇宙

雖曠莫知所厝又云蔬餐而已夫人間有不贍之墮山
澤無委積之儲方宜取給復乘之以法所向九折於何
得立若堂堂聖世而有首陽之餓夫明明時雍而有赴
海之死客於雅懷何如然體無毛羽不可袒而無衣月
亦匏瓜不可繫而不食自未造極要有所資年豐則取
足於百姓時儉則肆力以自供誠非所宜事不得已故
蝮蛇螫手斬以求全推其輕重蓋所存者大雖營一已
不求無獲求之不必一塗但令濟之有理亦何嫌多方

以為煩穢其欲役使不得妄動何固執之甚乎昔伯成
躬耕以墾殖沮溺耦作以修農陶朱商賈以營生於陵
灌蔬以自供崔文賣藥以繼乏君平卜筮以補空張衡
術數以馳名馬鈞奇巧以騁功此等直是違俗遁世之
人耳未正見有邈然絕塵與物天隔而咸共嗟詠不輟
於口然沙門之中迹超諸乏恥與流輩動有萬數至於
體道神化超落人封非可算計而未曾致言何其黨乎
宜共思校事實不可古今殊論衆寡異辭希簡為貴猥

多致賤恐非求精覈理之談也云自可廢之以一風俗
是何言歟聖人不誣十室三人必有師資芳蘭並茂而
欲蘊崇焚之不亦暴乎其中自有德宇淵邃器標時望
或翹楚皦潔栖寄清遠或殫思入微澄神絕境或敷演
微言散幽釋滯或精勤福業勸化崇善凡出家之本落
髮抽簪之日皆心口獨誓情到懇至雖生死彌綸玄塗
長遠要自驅策必階於道金輪之榮忽若塵垢帝釋之
重蔑若秕糠始者精誠乃有所感自非一舉頓詣體備

圓足其間何能不有小失且當錄其真素略舉玄黃安
得渾舉一概無復甄別不可以管蔡之釁姬宗盡誅四凶
之暴合朝流放此無異人苦頭虱因欲并首俱焚患在
足刺遂欲通股全解不亦濫乎云無益於時政有損於
治道夫弘道者之並世物有日用而不知故老氏云無為
之化百姓皆曰我自然斯言當矣是以干木高枕而魏
國大治庚桑善誨而畏壘歸仁沙門在世誠無目前考
課之功名教之外實有冥益近取五戒訓物非六經之

疇遠以八難幽嶮非刑法之匹請以三藏銓罪非律令之
流暘以般若辯惑非老莊之謂道品無漏拔苦因緣則
存而不論周孔之教理盡刑器至法之極兼練神明精
麤升降不可同日而語其優劣矣昔孛助化以道佐治
國境晏然民知其義年豐委積物無疵厲非益謂何云
世有五橫沙門處其一焉凡言橫者以其志無業尚散
誕莫名或博奕放蕩而傾竭家財或名挂編戶而浮游
卒歲或尸祿素餐而莫肯用心或執政居勢而漁食百

姓或馳競進趣而公私並損或肆暴姦虐而動造不軌
斯皆傷教亂正大敗風俗由是苟悅奮筆而遊俠之論
興韓非彈毫而五蠹之文作以之為橫理故宜然施之
沙門不亦誣乎國家方上與唐虞競巍巍之美下與殷
周齊郁郁之化不使箕顓專有傲世之賓商洛獨標嘉
遁之客甫欲大扇逸民之風崇肅方外之士觀子處懷
經略時政乃欲踵亡秦虎狼之嶮術襲商韓剋薄之弊
法坑焚儒典治無綱紀制太半之稅家無游財設三五

之禁備民如賊天下熬然人無聊生使嬴氏之族不訖於三世二子之禍即戮於當時臨刑之日方乃追恨始者立法之謬本欲寧國靜民不意隄防太峻反不容已事既往矣何嗟之及云一則誘喻一則迫脅且衆生緣有濃薄才有利鈍解有難易行有淺深是以啟誨之道不一悟發之由不同抑揚頓挫務使從善斯乃權謀之警策妙濟之津梁殊非誘迫之謂也云罪則冥伺福則神祐夫含德至淳則衆善歸焉易曰履信思順自天祐

之吉無不利又曰為不善於幽昧之中鬼得而誅之豈
非冥伺神明之祐哉善惡之報經有誠證不復具列云
會盡饍饍寺極壯麗此修福之家傾竭以儲將來之資
殫盡自為身之大計耳殆非神明歆其壯麗衆僧貪其
滋味猶農夫之播殖匠者之構室將擇楨材以求堂宇
之飾精簡種子以規嘉穀之實故稼穡必樹於沃壤之
地卜居要選於爽塏之處是以知三尊為衆生福田供
養自脩己之功德耳云割生民之珍玩崇無用之虛費

夫博施兼愛仁者之厚德崇飾宗廟孝敬之至心世教
若此道亦如之物有損之而益為之必獲且浮財糞土
施惠為神用譬朽木之為舟乃濟度之津要何虛費之
有哉欲端坐而望自然拱嘿以希安樂猶無柯而求伐
不食而徇飽焉可得乎苟身之不脩已為困矣何必乃
蔽百姓之耳目擁天下之大善既自飲毒復欲鳩人何
酷如之可謂亡我陷彼相與俱禍是以盲聾瘖瘂之對
經幽處彌劫之殃調達之報歷地獄無間之苦云罄私

家之年儲闕軍國之資實聖王御世淳風遐被震道綱
以維六合布德網以籠羣僞川無扣浪之夫谷無含歎
之士四民咸安其業百官各盡其分海內融通九州同
貫戎車於是寢駕甲士却走以冀嘉穀委於中田食儲
積而成朽童稚進德日新黃髮盡於眉壽當共擊壤以
頌太平鼓腹以觀盛化子何多慮之深橫憂時之不足
不亦過乎云恪大官而腫口臨滄海而攝腹真子之謂
也云繫影捕風莫知端緒夫偽辯亂真大聖之所悲嗟

時不識寶卞和所慟哭然妙旨希夷而體之者道沖虛
簡詣而會之者德用遠能津梁頽溺拔幽拯滯美濟常
時化流無外故神暉一震則感動大千睿澤暨灑則九
州蒙潤是以釋梵悟幽旨而歸誠帝王望玄宗而委質
八部挹靈化而洗心士庶觀真儀而奔至落落焉故非
域中之名教肅肅焉殆是方外之冥軌然恒牆峭峻
罕得其門器宇幽邃稀入其室是以道濟彌綸而理與
之乖德包無際而事與之隔子執迷自卑沒齒不悟盖

有以也夫日月麗天而聾者莫覩其明雷電震地而聾者不聞其響是誰之過與而方欲議宮商之音蔑文章之觀真過之甚者昔文鱗改視於初曜須拔開聽於後緣子何辜之不幸獨懷疑以終年比衆人之所悲最可悲之所先於是遂廵退席悵然自失良久曰聞大道之說彌貫古今大判因緣窮理盡性立理不為當年弘道不期一世可謂原始會終歸於命矣僕寔滯寢長夜未達其旨故每造有封今幸聞大夫之餘論結解疑散豁

然醒覺若披重霄以覩朗日發蒙蓋而悟真慧僕誠不

敏敬奉嘉誨矣

弘明集

釋道標

與恒同學雅有才力當時擅名

舍利弗阿毗曇序

十六國春秋弘始十六年太子泓親管理味道標為序

阿毗曇秦言無比法出自八音亞聖所述作之雖簡成
命曲備重徽曠濟神要莫比真祇洎之微風反衆流之
宏趣然佛後闇昧競執異津或有我有法或無我有法
乖忤淳風虧蒙聖道有舍利弗玄哲高悟神貫翼從德

備左面智叅照來其人以為是非之越大猷將隱既曰像
法任之益滯是以敢於佛前所聞經法親承即集先廵
隄防撫抑邪流助宣法化故其為經也先立章以崇本
後廣演以明義明義之體四焉問分也非問分也攝相
應分也緒分也問分者寄信扣擊明夫應會非問分者
假韻默通唯宣法相攝相應分者總括自他釋非相無
緒分者遠述因緣以彰性空性空彰則反迷至矣非相
無則相與用矣法相宣則邪觀息矣應會明則極無遺

矣四體圓足二諦義備故稱無比法也此經於先出阿
毗曇雖文言融通而旨格各異制又載自空以明宗極
故能取貴於當時而垂軌於千載明典振於遠維四衆
率尔同仰是使徇有者祛妄見之惑向化者起即隆之
動迢迢焉故冥宗之遺緒也疊疊焉故歸輪之所契也
此經標明曩代靈液西畛淳教彌於閭風玄問扇於東
嶺雖秦天王冲姿獻聖冥根樹於既往實相結於皇極
王德應符闡揚三寶聞茲典誥夢想思覽雖曰悠邈感

之愈勤會天竺沙門曇摩崛多曇摩耶舍等義學來遊
秦主既契宿心相與辯明經理趣起清言於名教之域
散衆微於自無之境超超然誠韻外之致惛惛然覆美
稱之實於是詔令傳譯然承華天哲道嗣聖躬玄味遠
流妙度淵極特體明旨遂讚其事經師本雖闇誦誠宜
謹備以秦弘始九年命書梵文至十年尋應令出但以
經趣微遠非徒闕言所契苟彼此不相領悟直委之譯
人者恐津梁之要未盡於善停至十六年經師漸聞秦

語令自宣譯皇儲親管理味言意兼了復所向盡然後
筆受即復內呈上討其煩重領其指歸故令文之者修
飾義之者綴潤并校至十七年訖若乃文外之功勝契
之妙誠非所階未之能詳並求之衆經考之諸論新異
之美自宣之文惟法住之實如有表裏然原其大體有
無兼用微文淵富義旨顯灼斯誠有部之永塗大乘之
靡趣先達之所宗後進之可仰標以近質綜不及遠情
未能已猥叅斯典希感之誠脫復微序庶望賢哲以恕

其鄙

出三藏記集
大藏摩字函

曇影

此人秦主勅住逍遙園助什
譯經著法華義疏并中論

中論序

夫萬化非無宗而宗之者無相虛宗非無契而契之者
無心故至人以無心之妙慧而契彼無相之虛宗內外
並冥緣智俱寂豈容名數於其間哉但以怖玄之質趣
必有由非名無以領數非數無以擬宗故遂設名而名
之立數而辯之然則名數之生生於累者可以造極而

非其極苟曰非極復何常之有也是故如來始逮真覺
應物接粗啟之以有後為大乘乃說空法化適當時所
悟不二流至末葉像教之中人根膚淺道識不明遂廢
魚守筌存指忘月覩空教便謂罪福俱泯聞說相則謂
之為真是使有無交興生滅迭爭斷常諸邊紛然競起
時有大士厥号龍樹爰託海宮建無生忍意在傍宗載
隆遺教故作論以折中其立意也則無言不窮無法不
盡然統其要歸則會通二諦以真諦故無有俗諦故無

無真故無有則雖無而有俗故無無則雖有而無雖有而無則不累於有雖無而有則不滯於無不滯於無則斷滅見息不存於有則常等冰消寂此諸邊故名曰中問答析微所以為論是作者之大意也亦云中觀直以觀辨於心論宣於口耳

出三藏
記集

釋文紀卷九